



Gemeinsam Äntwert vun der Madamm Justizminister, Elisabeth MARGUE, der Madamm Ministesch fir Gesondheet a sozial Sécherheet, Martine DEPREZ, an dem Här Finanzminister, Gilles ROTH op d'parlamentaresch Fro n°2917 vum 23. September 2025 vun der honorabelen Deputéiert Stéphanie WEYDERT.

- **Wéi steet d'Regierung zu de genannte Suergen a Problemer vu Koppelen, déi weder bestuet nach gepacst sinn a just mateneen „kummeren“? Gesäit d'Regierung hei e Besoin fir den aktuelle legale Kader am Beräich Ierfschaft an Hannerbliwenerenten ze iwwerdenken? Kéint een sech e spezielle Regime fir Koppele mat Kanner virstellen?**
- **Wa jo, wéi kéint esou eng Reform ausgesinn, respektiv wéi eng Alternativen zum aktuelle Regime kéinten an d'Diskussioun abruecht ginn?**

Den aktuelle legale Kader erlaabt et net-bestueten oder net-gepacste Koppelen hir patrimonial Relatiounen selwer ze reegelen. Am Beräich vun der Ierfschaft kënnen si Testamenter en faveur vun hirem Liewenspartner ofschléissen. Wéi bei bestueten oder gepacste Koppele mussen si heibäi natierlech d'réserv héritaire respektéieren.

D'Schafe vun engem zousätzleche legale Regime fir „gekummert“ Koppele géif d'Reegele vun der dévolution successorale weider verkomplizéieren. D'Notioun vun der „gekummerter“ Koppel misst och legal encadréiert ginn a gläichzäiteg oppe genuch si fir den affektiven a materiellen Realitéiten vun dëser Koppele Rechnung ze droen a restriktiv genuch si fir Abusen ze verhënneren.

Aus dëser Grënn gëtt d'Schafe vun engem speziellen Regime fir „gekummert“ Koppelen aktuell net envisagéiert.

- **Wéi eng steierlech Ënnerscheeder ginn et aktuell tëscht engem Mariage, engem PACS a Concubinage? Wéi géing déi steierlech Individualiséierung no der geplangter Reform ausgesinn?**

Am Beräich vun der Akommesbesteuerung ginn aktuell bestuete Koppele gemeinsam verulaagt, ausser si entscheeden sech fir eng Individualbesteuerung oder eng Individualbesteuerung mat Reallocation vum versteierbaren Akommes. Gepacste Koppele kënnen am Kader vun hirer Steuererklärung fir eng gemeinsam Verulagung (gemeinsamer Besteuerung) optéieren. Soss gi si jee no Situatioun entweder allebéid an der Steuerklasse 1 besteiert, oder deen een an der Steuerklasse 1 an deen anere mat Kand an der Steuerklasse 1a.

Wat déi steierlech Situatioun no der Aféierung vun der Individualiséierung ugeet verweise mir op den Dépôt vum Gesetzesprojekt.



- **Wéi eng Conditionne muss ee momentan erfëlle fir Usproch op eng Witwerent ze hunn? Ginn et Ureegung fir den aktuelle System ze iwwerschaffen?**

Fir datt de Wittmann / d'Wittfra oder de Partner dee mam Verstuerwenen ee PACS geschloss huet, d'Recht op eng Witwepensioun huet, muss fir d'éischt de Verstuerwenen eng Stagekonditioun erfëllen, dat heescht, hie muss an deene leschten 3 Joer viru sengem Doud mindestens 12 Méint Pflichtversécherung, Weiderversécherung oder fakultativ Versécherung opweise kënnen oder zum Zäitpunkt vu sengem Doud Beneficiaire vun enger Alters- oder Invalidepensioun gewiescht sinn. D'Periode vun 3 Joer gëtt verlängert wann se sech mat komplementare Versécherungszäiten am Sënn vum Artikel 172 vum Code de la sécurité sociale oder mat Perioden, wou de Verstuerwenen d'*Allocation d'inclusion* oder de *Revenu pour personnes gravement handicapées* krut, iwwerschneit. D'Stagekonditioun muss awer net erfëllt sinn, wann den Doud vum Verstuerwenen op een Accident oder op eng unerkannte Berufsskrankheet zréckzeféieren ass.

Nieft der Stagekonditioun, déi de Verstuerwenen erfëlle muss, gëtt et awer nach aner spezifesch Konditiounen:

- D'Bestietnis oder de Partenariat muss op mannst ee Joer gedauert hunn um Dag vum Doud vum Assuré oder um Dag, wou den Assuré d'Alters- oder d'Invalidepensioun krut.
- De Verstuerwenen duerf net scho Beneficiaire vun enger Alters- oder Invalidepensioun gewiescht sinn um Moment vum Bestietnis oder Partenariat.

Wann eng vun deenen zwou Konditiounen net erfëllt ass, huet de Wittmann / d'Wittfra oder de Partner keen Urecht op eng Witwepensioun, ausser eng vun den Ausnamekonditiounen ass erfëllt:

- Den Doud vum Verstuerwenen deen nach am Berufsliewe war oder dem Verstuerwenen seng Invalidepensioun sinn direkt op een Accident zréckzeféieren deen nom Bestietnis oder Partenariat geschitt ass.
- Ee Kand ass während dem Bestietnis oder Partenariat gebuer oder empfaange ginn oder duerch d'Bestietnis legitiméiert ginn.
- Wann den Altersënnerscheed zwëschent dem Verstuerwenen an dem Hannerbliwwenen manner wéi 15 Joer war an d'Bestietnis oder de Partenariat mindestens ee Joer gedauert huet um Dag vum Doud.
- Wann den Altersënnerscheed zwëschent dem Verstuerwenen an dem Hannerbliwwenen méi wéi 15 Joer war an d'Bestietnis oder de Partenariat mindestens 10 Joer gedauert huet um Dag vum Doud.

Am Fall vun enger Scheedung oder der Opléisung vum Partenariat virum Doud huet de gescheete Wittmann / déi gescheete Wittfra oder de fréiere Partner och d'Urecht op eng Witwepensioun ënnert deene selwechte Konditiounen wéi de Wittmann / d'Wittfra oder de Partner, awer just ënnert der Konditioun, datt ee virum Doud vum Verstuerwenen sech net nei bestuet huet oder een neie Partenariat agaangen ass.



- **Huet d'Regierung virgesinn staatlech Informatiounscampagnen iwwert d'Rechter an d'Konsequenze vun engem Mariage, engem PACS respektiv vun engem net-offiziell gereegelten Zesummeliewen, a gesäit d'Regierung e Besoin, dës Campagnen an Zukunft auszebauen?**

Eng Informatiounscampagne iwwert d'Rechter an d'Konsequenze vun engem Bestietnis, engem PACS respektiv vun engem net-offiziell gereegelten Zesummeliewen ass aktuell net envisagéiert.

D'Informatiounen iwwert de Mariage an de PACS sinn op enger sëllege staatlechen Internetsäiten accessibel, wéi zum Beispill *guichet.lu*, *justice.etat.lu* oder *mj.gouvernement.lu*.

- **Ass virgesinn, datt Koppelen zum Beispill iwwer d'Gemeinschaft méi transparent a praktesch Informatiounen kréien, besonnesch iwwert déi finanziell an ierfschaftlech Auswierkungen wann si sech fir e Mariage respektiv fir e PACS entscheiden? Hei kéint z.B. och e staatlech ausgeschafften Dépliant de Gemengen zur Verfügung gestallt ginn, fir datt all Gemeng déi selwescht Informatiounen un d'Koppelen weider gett.**

Dem Officier d'état civil seng Missioun ass et d'Deklaratiounen an d'Denonciatiounen vu PACS'en entgéint ze huelen, d'Zoustëmmung vun den zukünftege Conjointen zur Hochzäit ze iwwerpräiwen, d'Bestietnis ze zelebréieren an ze aktéieren. Et ass net dem Officier d'état civil seng Aufgab sech zur Opportunitéit vun de jeeweilege Regimer ze prononcéieren oder fiskalesch, respektiv juristesche Explikatiounen, Berodung oder Rotschléi an dësem Domaine ze ginn.

Wéi an der viregter Fro präziséiert gouf sinn déi pertinent Informatiounen op verschiddene staatlechen Internetsäiten accessibel. D'Gemeinschaft kënnen den interesséierte Bierger dës Internetsäiten ugin.

Lëtzebuerg, den 24. November 2025

D'Justizministesch

(s.) Elisabeth Margue